



**NOGOMETNI / FUDBALSKI SAVEZ  
BOSNE I HERCEGOVINE**

**PROPOZICIJE**  
**takmičenja Premijer ženske lige BIH za kadetkinje U-17**  
**za takmičarsku sezonu 2023/24.**

Maj/Svibanj 2023. godine

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj 17.05.2023. godine u Zenici, d o n o s i

## **PROPOZICIJE**

### **takmičenja Premijer ženske lige BiH za kadetkinje U-17 za takmičarsku sezonu 2023/24.**

#### **OPŠTE ODREDBE**

##### **Član 1.**

Učesnici takmičenja u Premijer ženskoj ligi BiH U-17, u takmičarskoj sezoni 2023/24 su 8 (osam) klubova, čije seniorke u istoj takmičarskoj sezoni učestvuju u takmičenju Premijer ženska liga BiH.

##### **Član 2.**

Takmičenjem Premijer ženske lige BiH U-17 rukovodi Komitet za takmičenje NS/FS BiH (u daljem tekstu Komitet), u saradnji sa Službom za takmičenje i suđenje NS/FS BiH.

##### **Član 3.**

Takmičenje u U-17 Premijer ženskoj ligi BiH obuhvata dva dijela koji su međusobno uslovljeni i oba se provode po dvostrukom bod sistemu, a prema Kalendaru takmičenja, koji na prijedlog Komiteta donosi Izvršni odbor NS/FS BiH.

Raspored odigravanja prvenstvenih utakmica prvog dijela takmičenja (14 kola) određen je žrijebom suprotno od žrijeba seniorki PŽL BiH.

Nakon odigranih 14 prvenstvenih kola takmičenja, te postignutih ukupnih rezultata, u skladu sa članom 43. Pravilnika o nogometnim/fudbalskim takmičenjima NS/FS BiH, formira se tabela prvog dijela takmičenja kao osnova za drugi dio prvenstvenog takmičenja.

U drugom dijelu nastavka takmičenja (dodatnih 6 kola), na osnovu utvrđenih rezultata iz jedinstvene tabele prvog dijela vrši se formiranje dvije lige od po 4 kluba, zavisno od plasmana na konačnoj tabeli prvog dijela, i to Elitna liga i Razvojna liga.

Elitnu ligu formiraju klubovi, kao grupnu fazu, koji su ostvarili takmičarski rezultat (redosljed) od 1. do 4. mjesta na konačnoj tabeli nakon završetka prvog dijela takmičenja.

Razvojnu ligu formiraju klubovi koji su ostvarili takmičarski rezultat (redosljed) od 5. do 8. mjesta na konačnoj tabeli nakon završetka prvog dijela takmičenja.

Klubovi koji su nastavili takmičenje u grupnoj fazi kroz Elitnu ligu i Razvojnu ligu, prenose sve svoje disciplinske mjere i takmičarske rezultate iz jedinstvene konačne tabele prvog dijela prvenstva kao polaznu osnovu za nastavak takmičenja u drugoj fazi takmičenja.

Ukoliko dva ili više klubova (ekipa) imaju isti broj bodova na mjestima jedinstvene konačne tabele koja obezbjeđuje takmičenje u Elitnoj ligi ili Razvojnoj ligi, plasman se određuje na osnovu dodatne pomoćne tabele, na osnovu rezultata koje su u međusobnim susretima ostvarili klubovi sa jednakim brojem bodova. Plasman na dodatnoj pomoćnoj tabeli utvrđuje se zbirom osvojenih bodova, osvojenih u oba dijela prvenstva.

Ako je zbir osvojenih bodova jednak, odlučuje razlika između datih i primljenih pogodaka/golova. Ako je razlika i tu jednaka odlučuje veći broj postignutih pogodaka/golova, a ako je i to jednako odlučuje ukupna gol razlika u prvom dijelu takmičenja svih klubova (ekipa), ako je i to isto odlučuje se žrijebom.

Raspored drugog dijela takmičenja po ligama, utvrđuje se posebno za svaku ligu na osnovu utvrđenih rezultata klubova iz tabele i mjesta na kome se nalazi klub u formiranoj ligi, uz primjenu Bergerovih tablica, gdje je svaki klub u ligi jednom domaćin i jednom gost, u skladu sa Kalendarom takmičenja NS/FS BiH za takmičarsku godinu.

U svim dijelovima takmičenja klubovi za pobjedu osvajaju 3 (tri) boda, a neriješen rezultat 1 (jedan) bod, dok za poraz klub nema bodova.

Utakmice traju 2 x 45 minuta .

Dva posljednja kola drugog dijela takmičenja igraju se istog dana i u isto vrijeme. Izuzetno od prethodnog stava, Komitet može utvrditi i drugi termin odigravanja utakmice, samo u slučaju da ista nema rezultatski značaj i ishod iste ne utiče na plasman na tabeli.

#### **Član 4.**

Odmor između dva dijela igre traje minimalno 10, a maksimalno 15 minuta.

#### **Član 5.**

Nakon obavljenog žrijeba, klubovi su obavezni da u roku od 10 (deset) dana dostave u Službu za takmičenje / natjecanje slijedeće informacije:

- naziv stadiona na kojem će se igrati utakmice,
- naziv alternativnog (rezervnog) stadiona primljenog od nadležne Komisije,
- mjesto i vrijeme odigravanja utakmica ,
- širi spisak igrača sa datumom rođenja, ime oca i broj legitimacije,
- boja dresova (osnovna i rezervna).

### **PROMJENA TERMINA ODIGRAVANJA UTAKMICA**

#### **Član 6.**

Promjena termina odigravanja utakmica se vrši u skladu sa članom 17. Pravilnika o nogometnim/fudbalskim takmičenjima NS/FS BiH.

Izuzetno od prethodnog stava, Komitet može u opravdanim slučajevima, ili u pismenom dogovoru klubova, odobriti izmjenu dana i satnice odigravanja pojedinih utakmica.

### **DUŽNOSTI KLUBOVA**

#### **Član 7.**

Klub domaćin je obavezan za utakmicu pripremiti svlačionice i teren za igru, a odluku o pogodnosti terena donosi isključivo sudija utakmice.

#### **Član 8.**

Klubovi su dužni doći na stadion odigravanja utakmice 60 minuta prije zakazanog početka.

#### **Član 9.**

Klub domaćin obavezan je da delegatu utakmice stavi na raspolaganje računar sa internet konekcijom i štampač, te da pruži svu neophodnu pomoć u sastavljanju zapisnika. Takmičenje se administrativno vodi kroz COMET informacioni sistem. Klubovi su dužni da najkasnije 45 minuta prije početka utakmice, dostave delegatu na propisanom obrascu, spisak igrača i službenih lica koja će nastupati na utakmici. Sve osobe, igrači i službena lica, sa dostavljenog propisanog obrasca za utakmicu, moraju biti licencirana od strane NS/FS BiH i registrovana u Comet-u.

U slučaju da sistem Comet nije u funkciji vođenje zapisnika sa utakmice se radi ručno, na za to propisanom obrascu, a naknadno će delegat u sistemu Comet napraviti zapisnik. Ručni zapisnik piše se u četiri primjerka i potpisuju ga delegat, sudija i predstavnici klubova.

#### **Član 10.**

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona/područja, zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije.

#### **Član 11.**

Klub domaćin je dužan da preduzme sve mjere u cilju obezbjeđenja ličnosti: članova gostujuće ekipe i službenih lica prije utakmice, za vrijeme odigravanja utakmice i po završetku utakmice, sve do napuštanja stadiona i mjesta odigravanja utakmice.

Domaći klub je, također, dužan da obezbijedi odgovarajuću dežurnu redarsku službu dovoljnim brojem redara, te prisustvo pripadnika policije, ljekara, vozila hitne pomoći, 2-4 lica sa nosilima i dovoljan broj sakupljača lopti (minimalno 6).

Klub-domaćin je obavezan nadležnoj policijskoj upravi prijaviti mjesto i vrijeme odigravanja utakmice, te druge relevantne podatke na zahtjev policijske uprave.

Bez pripadnika policije, vozila za hitnu pomoć i ljekara, utakmica se neće igrati.

Za propuste u organizaciji utakmice klubovi će snositi takmičarske i disciplinske posljedice prema važećim propisima NS/FS BiH.

Klub domaćin obavezan je nezavisnoj snimateljskoj kompaniji, koju ovlasti NS/FS BiH, omogućiti adekvatne uslove (na centralnom dijelu stadiona) za snimanje utakmice.

Također, TV kompaniji koja vrši direktni prijenos utakmice, klub je dužan osigurati punu sigurnost za opremu i djelatnike, za vrijeme i nakon završetka utakmice, u objektu stadiona.

### **Član 12.**

Za vrijeme odigravanja prvenstvenih utakmica u stadionu, pored terena za igru, u tehničkom prostoru moraju se nalaziti slijedeća licencirana lica (u ovisnosti da li je klub domaćin ili gost), a u suprotnom klub snosi disciplinske posljedice:

1. predstavnik/ca kluba - prikladno obučen/a (obaveza oba kluba)
2. glavni/a trener/ica - prikladno obučen/a ili u trenerci kluba, koji/a posjeduje najmanje trenersku UEFA B licencu (obaveza oba kluba)
3. igrači u sportskoj opremi - u markerima
4. ljekar kluba (obaveza kluba domaćina)
5. fizioterapeut (obaveza kluba domaćina).

Predstavnik/ica kluba, glavni/a trener/ica ili pomoćni/a trener/ica ne mogu biti ista osoba

Navedena lica obavezna su posjedovati odgovarajuću validne evidentirane u Comet sistemu.

Po završenom procesu licenciranja, službena lica kluba moraju biti registrovana u Comet-u od strane Odjela za ligaška takmičenja/natjecanja, odnosno Centra za edukaciju kada su u pitanju treneri.

Validnost evidentiranih licenci i identitet lica mogu kontrolisati samo subjekti koji su ih i izdali i delegat na utakmici. Identitet osoba iz zapisnika utvrđuje se na osnovu fotografije iz Comet-a.

Osobe čiji se identitet ne može utvrditi, nisu registrovane u Comet-u, za funkciju koju obavljaju na utakmici, i/ili im validna licenca nije unešena u Comet, ne mogu se nalaziti u tehničkom prostoru, osim zamjenskih igračica za koje važe odredbe člana 18.

## **KALENDAR TAKMIČENJA**

### **Član 13.**

Raspored odigravanja utakmica objavljuje Odjel za ligaška takmičenja/natjecanja NS/FS BiH putem web stranice i to najkasnije 15 (petnaest) dana prije početka takmičenja.

Raspored odigravanja utakmica za određeno kolo dostavlja se klubovima. Raspored sadrži mjesto igranja, takmičarski par i dan sa satnicom odigravanja utakmica, te obavezuje klubove da u skladu s tim odigraju utakmicu.

Utakmice u Premijer ženskoj ligi BiH U-17 se igraju subotom i nedjeljom. Utakmice koje se igraju tokom sedmice, igraju se srijedom.

## **ORGANIZACIJA UTAKMICA - OBAVEZE I ODGOVORNOSTI**

### **Član 14.**

Odredbe o organizaciji i redu na utakmicama donose organi koji rukovode takmičenjem u skladu sa odredbama Pravilnika o nogometnim/fudbalskim takmičenjima NS/FS BiH i Propozicijama takmičenja Premijer ženske lige BiH za kadetkinje.

### **Član 15.**

U slučaju nastanka štete, odgovoran je klub domaćin, koji oslobađa NS/FS BiH svih zahtjeva za naknadu štete nastale organizacijom utakmice.

## **IDENTITET IGRAČICA I PRAVO NASTUPA**

### **Član 16.**

Na prvenstvenim utakmicama mogu nastupiti samo igračice čiji je identitet utvrđen putem fotografije iz Comet sistema, a u slučaju da Comet nije u funkciji, identitet će se utvrditi na osnovu javne isprave: lične karte ili pasoša, odnosno štampane ID Comet kartice. Za igračicu sa neadekvatnom pohranjenom fotografijom u Cometu (kada je nemoguće utvrditi identitet), delegat utakmice neće dozvoliti nastup na utakmici.

Identitet se u pravilu utvrđuje prije početka utakmice.

Za igračice koje su zakasnile na početak utakmice, odnosno na početak drugog dijela, a upisane su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

### **Član 17.**

Pravo nastupa za ekipu kadetkinja imaju sve pravilno registrirane igračice, rođene 01.01.2007. godine i mlađe, ali ne mlađe od navršениh 13 godina starosti.

Na utakmicama mogu nastupiti samo one igračice koje su proglašene zdravstveno sposobnim. Svaka igračica koja nastupa u takmičenju mora u Comet-u imati unesen period važenja ljekarskog pregleda i period za koji je uplaćena članarina.

Obavljeni ljekarski pregled mora sadržavati obavezujuće elemente koje je propisao Komitet za sportsku medicinu NS/FS BiH.

Za igrača koji nema upisan važeći ljekarski pregled u Comet -u, delegat utakmice neće dozvoliti nastup na utakmici.

Rok valjanosti ljekarskog pregleda četiri (4) mjeseca.

### **Član 18.**

Automatsku kaznu zabrane igranja jedne prvenstvene utakmice, nastalu zbog tri žuta kartona, igračica izdržava na prvoj narednoj utakmici, u skladu sa odredbama Disciplinskog pravilnika NS/FS BiH.

Na prvenstvenim i Kup utakmicama u zapisnik sa utakmice može biti upisano najviše sedam (7) zamjenskih igračica, od kojih u igru može ući najviše pet tokom najviše tri prekida igre (u suprotnom ekipe snose disciplinske sankcije).

Ukoliko neka od ekipa nema u zapisniku utakmice prijavljenih najmanje 14 (četnaest) igračica onda ista snosi disciplinske posljedice.

Igračica ne može nastupiti na dvije zvanične utakmice u toku istog dana, tj. prije proteka 24 sata od završetka prve utakmice.

Igračica koja je upisana u zapisnik utakmice, smatra se da nije nastupila ukoliko nije ušla u igru.

## **DELEGAT(ICA) NA UTAKMICI I ZAPISNIK**

### **Član 19.**

Delegata(icu) na utakmici u takmičenju Premijer ženske lige BiH U-17 određuje Komitet, iz reda delegatica Premijer ženske lige BiH, te po potrebi i delegata koji se nalaze na nižim listama entitetskih saveza.

Prava i obaveze delegata(ice) na utakmici na ovom nivou takmičenja, uređena su odredbama Pravilnika o nogometnim/fudbalskim takmičenjima BiH i Propozicijama takmičenja Premijer ženske lige BiH.

Delegat(ica) zastupa Komitet i ima vrhovni nadzor na utakmici.

Delegat(ica) utakmice je obavezan odmah nakon odigrane utakmice unijeti sve podatke o utakmici u COMET sistem, a iste treba sravniti i zaključiti sutkinja utakmice sa svojom šifrom.

Delegat utakmice je obavezan odmah po završetku utakmice istu zaključiti putem Fair-playa, a u roku od 24 sati po odigranoj utakmici, sačiniti i zaključiti izvještaj, putem Comet-a, te spiskove igrača podići u Comet sekciju Dokumenti, svoga izvještaja.

Komitet donosi posebno Upustvo o vršenju dužnosti delegata.

#### **Član 20.**

Delegat(ica) je obavezan da 60 minuta prije početka prve utakmice održi radni sastanak sa predstavnicima klubova i sudijama utakmice. U slučaju potrebe delegat(ica) može zatražiti prisustvo i drugih učesnika (predstavnik policije i redarske službe kluba) na radnom sastanku.

Delegat(ica) sastavlja zapisnik sa utakmice u prisustvu sudije utakmice i predstavnika klubova.

Zapisnik sa utakmice se popunjava elektronski, u COMET sistemu.

### **SUDIJE / SUCI**

#### **Član 21.**

Utakmice takmičenja Premijer ženske lige BiH za kadetkinje mogu voditi sudije sa „A“ i „B“ liste Premijer ženske lige BiH, Prve ženske lige FS RS i Prve ženske lige NS F BiH, te po potrebi i perspektivne ženske sudije i sudije nižeg stepena takmičenja, čije određivanje vrši Komitet za sudije i suđenje NS/FS BiH.

Prava i obaveze sudija na ovom nivou takmičenja, uređena su odredbama Pravilnika o nogometnim/fudbalskim takmičenjima BiH, Pravilnikom o sudijama i suđenju NS/FS BiH i Propozicijama takmičenja Premijer ženske lige BiH.

### **STADION I TEREN ZA IGRU**

#### **Član 22.**

Prvenstvene utakmice Premijer ženske lige za kadetkinje se igraju na terenima koje je odobrio NS/FS BiH.

Teren za igru, stadioni i uslovi za odigravanje utakmica moraju biti u skladu sa odredbama Pravilnika o nogometnim/fudbalskim takmičenjima BiH.

### **ZABRANA NASTUPA ZBOG SUSPENZIJE**

#### **Član 23.**

Suspendovana ekipa ne može nastupiti na javnoj utakmici sve dok traje suspenzija.

### **ŽALBA**

#### **Član 24.**

Žalbe na utakmicu podnose se Komitetu za takmičenje NS/FS BiH koji ih rješava u prvom stepenu.

Žalbe se po svim osnovama moraju najaviti uz obrazloženje, elektronskim putem, telegramski, e-mailom ili faxom koji ima automatski ispis datuma i vremena o najavi žalbe. Najavu žalbe dostaviti u NS/FS BiH u roku od 24 sata po odigranoj utakmici, a pismeno obrazloženje sa dokazom o uplaćenju taksu mora se dostaviti NS/FS BiH u roku od 48 sati po odigranoj utakmici. Za utakmice posljednja dva kola prvenstva, žalbe se najavljuju i dostavljaju u roku od 2 (dva) dana od dana odigravanja utakmice.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi slijedeći radni dan.

Žalba se dostavlja Komitetu putem Odjela za ligaška takmičenja/natjecanja NS/FS BiH.

Uz žalbu se dostavlja dokaz o uplaćenju taksu u skladu sa odlukom IO NS/FS BiH.

Odluke o podnijetim žalbama na utakmice donose se najkasnije u roku od četrnaest (14) dana od dana prijema žalbe, odnosno pet (5) dana ukoliko se radi o žalbi na utakmicu odigranu u posljednja dva kola prvenstva.

## **TAKSA NA ŽALBU**

### **Član 25.**

Iznos takse na žalbu je određena posebnom odlukom IO NS/FS BiH.  
Taksa se vraća podnosiocu samo ukoliko se žalba u potpunosti usvoji.

### **Član 26.**

Nenajavljene, neblagovremene ili nedovoljno taksirane žalbe neće biti uzete u postupak, već će biti odbačene, a utakmica će biti registrovana postignutim rezultatom.

Pri ocjeni pravovremenosti žalbe uzima se u obzir datum e-maila, poštanskom žigu preporučenog pisma ili telegrama, datum na faksu potvrdi o žalbi odaslanog telefaksom ili datum na novčanoj uplatnici.

### **Član 27.**

Žalbe na odluke Komiteta za takmičenje podnose se Apelacionoj komisiji NS/FS BiH u roku od osam (8) dana od prijema pismene odluke.

Za utakmice dva posljednja kola rok za podnošenje žalbe je tri (3) dana. Žalba se podnosi putem Komiteta za takmičenje čija se odluka žalbom pobija.

Odluke o podnijetim žalbama na odluke Komiteta za takmičenje donose se najkasnije u roku od osam (8) dana, a o žalbama podnijetim na utakmice posljednja dva kola u roku od tri (3) dana od dana prijema žalbe.

Žalbe na odluke Disciplinskog komisije podnose se Apelacionoj komisiji u roku od osam (8) dana od prijema pismene odluke.

Protiv odluke Apelacione komisije ne može se uložiti žalba.

### **Član 28.**

U interesu regularnosti takmičenja, organ koji donosi odluke može utvrditi i skraćeni žalbeni postupak.

## **REGISTRACIJA UTAKMICA**

### **Član 29.**

Ako na utakmicu nije uložena žalba, a ne postoje uslovi za registraciju po službenoj dužnosti, utakmicu Komitet registruje postignutim rezultatom.

Ako je prvostepena odluka pravosnažna, ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim/fudbalskim takmičenjima NS/FS BiH.

Komitet vrši analizu i registraciju odigranih utakmica na prvom narednom sastanku, a termin održavanja istog utvrđuju u skladu sa članom 9. stav 1 Pravilnika o radu komiteta Izvršnog odbora i pravnih tijela NS/FS BiH.

Izuzetno, Komitet registraciju odigranih utakmica može izvršiti putem e-maila, telefona ili faksa. Verifikaciju registrovanih utakmica vrši Komitet na prvoj narednoj sjednici.

Ako je na utakmicu uložena žalba, rok za registraciju utakmice se produžava do konačne odluke.

## **DISCIPLINSKE SANKCIJE**

### **Član 30.**

O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH.

## **OBNAVLJANJE LIGE**

### **Član 31.**

Iz Premijer ženske lige za kadetkinje na kraju takmičarske sezone 2022/23, ispadaju dvije ekipe čije su seniorke ispale iz Premijer ženske lige BiH, a liga se popunjava obavezno ekipama klubova koji su stekli pravo takmičenja u Premijer ženskoj ligi BiH za seniorke u takmičarskoj sezoni 2023/24.

## **UTVRĐIVANJE PLASMANA**

### **Član 32.**

Ekipe koje pobijedi na utakmici, osvaja tri boda, a u slučaju neriješenog rezultata svaka ekipa osvaja po jedan bod.

Plasman klubova na tabeli utvrđuje se prema odredbama člana 43. Pravilnika o nogometnim/fudbalskim takmičenjima BiH.

## **FINANSIJSKE OBAVEZE U OKVIRU OVOG TAKMIČENJA**

### **Član 33.**

Shodno odluci Izvršnog odbora NS/FS BiH, klubovi su oslobođeni plaćanja kotizacije za takmičenje u takmičarskoj sezoni 2022/23.

### **Član 34.**

Službenim licima za utakmice Premijer ženske lige BiH za kadetkinje pripada taksa i putni troškovi u skladu sa odlukom IO NS/FS BiH.

### **Član 35.**

Obračun i isplatu troškova službenim licima Premijer ženske lige BiH za kadetkinje će vršiti NS/FS BiH, iz finansijskih sredstava koje obezbjeđuje UEFA za razvoj ženskog nogometa/fudbala u klubovima Premijer ženske lige BiH.

Također, iz istih sredstava će se klubovima isplatiti po 5.000 KM, za podršku finansiranja organizacije utakmica.

## **NAGRADE**

### **Član 36.**

Prvaku Bosne i Hercegovine u kategoriji Premijer ženske lige BiH za Kadetkinje dodjeljuju se: pehar i 30 zlatnih medalja.

## **PRELAZNE I ZAVRŠNE ODREDBE**

### **Član 37.**

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima BiH, Pravila nogometne/fudbalske igre, Propozicija takmičenja BH Telecom Premijer lige BiH i drugih propisa i odluka NS/FS BiH, kao i pravila Međunarodnog BOARD-a.

Za tumačenje ovih Propozicija nadležan je IO NS/FS BiH, putem Pravnog komiteta NS/FS BiH.

### **Član 38.**

Propozicije stupaju na snagu danom donošenja, a primjenjuju se za takmičarsku sezonu 2023/24.

**P R E D S J E D N I K**  
**Vico Zeljković**





## NOGOMETNI/FUDBALSKI SAVEZ BIH

Broj: 02 - 1693 - 2f/23.

Sarajevo, 17.05.2023. godine

Izvršni odbor Nogometnog/Fudbalskog saveza Bosne i Hercegovine, na osnovu člana 35. Statuta Nogometnog/Fudbalskog saveza BiH, na prijedlog Komiteta za takmičenje NS/FS BiH, na sjednici održanoj u Zenici, dana 17.05.2023. godine, d o n o s i

### **O D L U K U** **o Kalendaru takmičenja Premijer ženske lige BiH U-17** **takmičarska sezona 2023/24.**

#### **JESENJI DIO**

<b>August/ Kolovoz</b>	19/20.08.2023.	1. kolo PŽL BiH U-17	17:00	
	26/27.08.2023	2. kolo PŽL BiH U-17	17:00	
<b>Septembar/ Rujan</b>	02/03.09.2023	3. kolo PŽL BiH U-17	16:30	
	09/10.09.2023.	4. kolo PŽL BiH U-17	16:30	
	16/17.09.2023.	5. kolo PŽL BiH U-17	16:30	
	<b>18.09. - 26.09.2023.</b>	<b>INTERNACIONALNI TERMIN</b>		
	30.09./01.10.2023.	6. kolo PŽL BiH U-17	16:00	
<b>Oktobar/ Listopad</b>	07/08.10.2023.	7. kolo PŽL BiH U-17	15:30	
	14/15.10.2023.	8. kolo PŽL BiH U-17	15:00	
	21/22.10.2023.	9. kolo PŽL BiH U-17	15:00	
	<b>23.10. - 01.11.2023.</b>	<b>INTERNACIONALNI TERMIN</b>		
<b>Novembar/ Studen</b>	04/05.11.2023.	10. kolo PŽL BiH U-17	14:30	
	11/12.11.2023.	11. kolo PŽL BiH U-17	13:30	
	<b>27.11. - 06.12.2023</b>	<b>INTERNACIONALNI TERMIN</b>		

**PROLJETNI DIO**

<b>Mart/ Ožujak</b>	16/17.03.2024.	12. kolo PŽL BiH U-17	15:00	
	23./24.03.2024.	13. kolo PŽL BiH U-17	15:00	
	30.03.2024.	14. kolo PŽL BiH U-17	15:30	
<b>April/ Travanj</b>	<b>01.-09.04.2024.</b>	<b>INTERNACIONALNI TERMIN</b>		
	13/14.04.2024.	1. kolo PŽEL BiH U-17 1. kolo PŽRL BiH U-17	16:30	
	20/21.04.2024.	2. kolo PŽEL BiH U-17 2. kolo PŽRL BiH U-17	16:30	
	27/28.04.2024.	3. kolo PŽEL BiH U-17 3. kolo PŽRL BiH U-17	16:30	
<b>Maj/ Svibanj</b>	04/05.05.2024	4. kolo PŽEL BiH U-17 4. kolo PŽRL BiH U-17	17:00	
	12.05.2024.	5. kolo PŽEL BiH U-17 5. kolo PŽRL BiH U-17	17:00	
	19.05.2024.	6. kolo PŽEL BiH U-17 6. kolo PŽRL BiH U-17	17:00	

**P R E D S J E D N I K****Vico Zeljković**